

**Broj:04-01-1258-12/09**  
**Mostar, 16.03.2010. godine**

Na osnovu člana 29. i člana 41. Zakona o električnoj energiji (Službene novine Federacije BiH broj 41/02, 24/05, 38/05, 61/09), člana 12. stava (1) i člana 14. stava (1) Statuta Regulatorne komisije za električnu energiju u Federaciji Bosne i Hercegovine (Službene novine Federacije BiH broj 13/04), kao i člana 31. stava (2) i člana 37. stava (4) Poslovnika o radu Regulatorne komisije za električnu energiju u Federaciji Bosne i Hercegovine (Službene novine Federacije BiH broj 59/04), te člana 83. i člana 91. stava (2) Pravilnika o javnim raspravama i rješavanju zahtjeva i žalbi Regulatorne komisije za električnu energiju u Federaciji Bosne i Hercegovine (Službene novine Federacije BiH broj 37/05) i člana 13. Opštih uslova za isporuku električne energije (Službene novine Federacije BiH broj 35/99), a postupajući po Žalbi/prigovoru na Odgovor (broj 03-4-34221-8422/08 od 30.06.2009. godine) na zahtjev za izdavanje elektroenergetske saglasnosti broj 202-2635/09, primljenoj u JP Elektroprivreda BiH d.d.-Sarajevo, Podružnica „Elektrodistribucija“ Sarajevo pod brojem 8422/09 dana 15.07.2009. godine, podnosioca žalbe Samire Zulfikarpašić iz Sarajeva, Regulatorna komisija za električnu energiju u Federaciji Bosne i Hercegovine-FERK je, na IV redovnoj sjednici održanoj u Mostaru dana 16.03.2010. godine, donijela

## **RJEŠENJE**

1. Odbija se žalba/prigovor Samire Zulfikarpašić iz Sarajeva podnijeta protiv Odgovora (broj 03-4-34221-8422/08 od 30.06.2009. godine) na zahtjev za izdavanje elektroenergetske saglasnosti broj 202-2635/09, koje je dala JP Elektroprivreda BiH d.d. - Sarajevo, Podružnica „Elektrodistribucija“ Sarajevo, kao neosnovana.
2. Ovo rješenje je konačno i stupa na snagu danom donošenja, te se objavljuje na oglasnoj tabli i web stranici FERK-a, a dispozitiv ovog rješenja u Službenim novinama Federacije BiH.

## **Obrazloženje**

U skladu sa članom 41. Zakona o električnoj energiji, proizvođač, odnosno kvalifikovani kupac električne energije kojem je odbijen pristup mreži ili je nezadovoljan uslovima za pristup, može podnijeti žalbu/prigovor FERK-u, što je propisano i članom 83. Pravilnika o javnim raspravama i rješavanju zahtjeva i žalbi FERK-a. Članom 13. Opštih uslova za isporuku električne energije propisano je da podnosilac zahtjeva koji nije zadovoljan odlukom kojom je riješen njegov zahtjev za izdavanje elektroenergetske saglasnosti, može izjaviti žalbu nadležnom organu uprave u skladu sa zakonom. Članom 91. stavom (2) Pravilnika o javnim raspravama i rješavanju zahtjeva i žalbi FERK-a propisano je da se na sva pitanja koja se odnose na postupke pred FERK-om, a koja nisu propisana ovim pravilnikom ili posebnim pravilima i propisima FERK-a, primjenjuju na odgovarajući način pravila odnosnih zakona ako to priroda stvari dozvoljava i kada je to u skladu sa nadležnostima i ovlaštenjima FERK-a.

Na osnovu navedenog, podnosilac žalbe Samira Zulfikarpašić iz Sarajeva je 15.07.2009. godine uputila žalbu/prigovor JP Elektroprivredi BiH d.d. - Sarajevo, Podružnici „Elektrodistribucija“ Sarajevo, koja je primljena kod te podružnice pod brojem 8422/09. Navedena žalba/prigovor se odnosi na Odgovor na zahtjev za izdavanje elektroenergetske saglasnosti broj 202-2635/09, koji je podnosiocu žalbe uputila JP Elektroprivreda BiH d.d. - Sarajevo, Podružnica „Elektrodistribucija“ Sarajevo pod brojem 03-4-34221-8422/08 dana 30.06.2009. godine. Predmetnim odgovorom je JP Elektroprivreda BiH d.d. - Sarajevo, Podružnica „Elektrodistribucija“ Sarajevo odbila Zahtjev za izdavanje elektroenergetske saglasnosti zbog priključenja na elektrodistributivnu mrežu podnosioca žalbe, koji je podniet 20.05.2009. godine pod brojem 202-2635/09, a čime je istoj odbijen pristup mreži. Međutim, u odnosu na navedenu žalbu/prigovor od 15.07.2009. godine, JP Elektroprivreda BiH d.d. - Sarajevo, Podružnica „Elektrodistribucija“ Sarajevo, nije postupila u skladu sa članom 13. Opštih uslova za isporuku električne energije, odnosno nije primljenu žalbu/prigovor prosljedila FERK-u, kao nadležnom organu.

U vezi s navedenim, podnosilac žalbe je dostavio direktno FERK-u dopis primljen pod brojem 04-01-1258/09 dana 27.10.2009. godine, a koji je dostavljen i Kantonalnoj upravi za inspeksijske poslove Sarajevo 26.10.2009. godine. Kantonalna uprava za inspeksijske poslove Sarajevo je navedeni dopis prosljedila FERK-u, te je isti ponovo primljen 13.11.2009. godine pod brojem 04-01-1258-01/09.

Povodom primljenog dopisa podnosioca žalbe, FERK je 13.11.2009. godine uputio dopis (Žalba/prigovor Samire Zulfikarpašić na Odgovor na zahtjev za izdavanje elektroenergetske saglasnosti broj 202-2635/09, Vaš broj 03-4-3422-8422/08 od 30.06.2009. godine) JP Elektroprivredi BiH d.d. - Sarajevo, Podružnici „Elektrodistribucija“ Sarajevo. Navedenim dopisom je zatraženo od iste da u skladu sa članom 91. stavom (2) Pravilnika o javnim raspravama i rješavanju zahtjeva i žalbi FERK-a po predmetnoj žalbi/prigovoru postupi u smislu ispitivanja da li je ista dopuštena, blagovremena i izjavljena od ovlaštenog lica, kao i da ocijeni opravdanost iste, a u skladu sa pozitivnim zakonskim propisima, sve bez odlaganja, a najkasnije u roku od osam dana od dana prijema tog dopisa. Navedeno javno preduzeće je upućeno i da ukoliko žalbu/prigovor ne uvaži kao opravdanu, da je u istom roku dužno žalbu/prigovor sa cjelokupnim spisom predmeta dostaviti FERK-u na daljnji postupak. U isto vrijeme je zatraženo od ovog javnog preduzeća da se u naprijed navedenom roku posebno izjasni o okolnosti da je po Zahtjevu za izdavanje elektroenergetske saglasnosti primljenom 20.05.2009. godine donijelo, odnosno dostavilo podnosiocu tog zahtjeva Odgovor na zahtjev za izdavanje elektroenergetske saglasnosti broj 202-2635/09, njihov broj 03-4-34221-8422/08 od 30.06.2009. godine, a kojim Odgovorom odbija njen zahtjev, bez pouke o pravnom lijeku, te da je (kako je podnosilac žalbe naveo) ponovo je kontaktirao i reklo da ima rješenje za nju, da bi se izvršilo priključenje električne energije, ali da je potrebno da preda novi zahtjev za izdavanje elektroenergetske saglasnosti i da po novom cjenovniku treba platiti oko 6.500 KM za isti priključak. Pri tome je zatraženo i pojašnjenje o kakvom se novom rješenju priključenja električne energije radi, u odnosu na Prethodnu elektroenergetsku saglasnost broj 202-6622/08 od 26.12.2008. godine, u kojoj je navedeno da se priključenje

objekta predviđa s postojeće niskonaponske nadzemne elektrodistributivne mreže iz TS 10/(20)/0,4 kV Faletići 1 (43), zatim da je u svrhu priključenja potrebna izgradnja nove niskonaponske nadzemne elektrodistributivne mreže na armirano-betonskim stubovima i magistralnim SKSX00/0-A 3x70+71,5mm<sup>2</sup>, te priključnim samonosivim kablovskim snopom X00/A 4x16mm<sup>2</sup> od stuba koji se predviđa u blizini predmetnog objekta, te da se mjesto mora nalaziti na objektu kupca i biti dostupno u svakom trenutku.

Kako JP Elektroprivreda BiH d.d. - Sarajevo, Podružnica „Elektrodistribucija“ Sarajevo nije postupila u skladu sa navedenom FERK-ovom dopisu, FERK je istoj 2.12.2009. godine uputio Urgenciju broj 04-01-1258-03/09.

Povodom navedenog, JP Elektroprivreda BiH d.d. - Sarajevo, Podružnica „Elektrodistribucija“ Sarajevo je 08.12.2009. godine dostavila FERK-u dopis primljen pod brojem 04-01-1258-04/09, te ponovno 14.12.2009. godine pod brojem 04-01-1258-05/09. U tom dopisu je ista navela da su po zahtjevu Samire Zulfikarpašić za izdavanje elektroenergetske saglasnosti broj 202-2635/09 od 20.5.2009. godine, za stambeni objekat na adresi Donje Biosko do br. 34, ovlaštene zaposlenici ovog javnog preduzeća izlaskom na teren utvrdili da na predmetnom lokalitetu ne postoji elektrodistributivna mreža Podružnice „Elektrodistribucija“ Sarajevo, nego bespravna mreža i bespravni kupci, te s obzirom da se Samira Zulfikarpašić prva javila sa zahtjevom za izdavanje elektroenergetske saglasnosti na navedenoj adresi, kao i da za priključenje na elektrodistributivnu mrežu u tom trenutku nisu postojali tehnički uslovi, da je navedena podružnica istoj uputila dopis pod brojem 03-4-34221-8422/08 od 02.07.2009. godine. Navedeno je da je istovremeno Podružnica „Elektrodistribucija“ Sarajevo poduzela pripremne aktivnosti za izgradnju nove elektrodistributivne mreže na predmetnom lokalitetu, da je sačinjeno tehničko rješenje za izgradnju novog dijela niskonaponske mreže, te da je po Nalogu za izvođenje radova broj: 1602-I-1 od 23.10.2009. godine izvršena izgradnja dijela niskonaponske mreže TP Faletići I (0043), uz napomenu da je planom ulaganja Podružnice „Elektrodistribucija“ Sarajevo za 2011. godinu predviđena i izgradnja nove transformatorske stanice 10(20)/0,4 kV FALETIĆI i nazivne snage 630 kVA, umjesto postojeće stubne transformatorske stanice nazivne snage 160 kVA. Navedeno je i to da na ovom lokalitetu svi stambeni objekti nemaju odobrenje za građenje, pa da će se na novoizgrađenu niskonaponsku mrežu moći priključiti samo objekti koji trenutno imaju odobrenje za građenje, a time i objekat podnosioca žalbe na adresi Donje Biosko do br. 34. Također je navedeno i da je, imajući u vidu član 97. važećih Opštih uslova za isporuku električne energije kao i član 27. stav (3) Pravilnika o priključcima potrebno da podnosilac žalbe podnese zahtjev za izdavanje elektroenergetske saglasnosti u skladu sa ovim aktima, o čemu je ista obaviještena, a s obzirom da je u Zahtjevu za izdavanje elektroenergetske saglasnosti podnosilac žalbe naveo da potrebna priključna snaga iznosi 23 kW, da u skladu sa Odlukom o utvrđivanju jediničnih naknada za priključenje, član 3. i član 4, prvi dio jednokratne naknade iznosi 6.000,93 KM.

Uz ovaj dopis dostavljene su kopije:

- Naloga za izvođenje radova broj: 1602-I-1 od 23.10.2009. godine,
- Građevinske knjige (materijal) za sanaciju magistralnih vodova TP Faletići 1 od 4.12.2009. godine,

- Izvoda iz baze podataka u vezi ulaganja, koji se odnosi na TS 10(20)/0,4 kV Faletići (0043),
- Molbe mještana naselja Donje Biosko od 07.09.2009. godine,
- Odgovora na zahtjev za izdavanje elektroenergetske saglasnosti broj 202-2635/09, broj 03-4-34221-8422/08 od 30.06.2009. godine,
- Zahtjeva za izdavanje elektroenergetske saglasnosti zbog priključenja na elektrodistributivnu mrežu broj 202-2635/09 od 20.05.2009. godine,
- Rješenja o naknadnom odobrenju za građenje Općine Stari grad broj UP-I-05-23-588/09-ET od 29.04.2009. godine.

Međutim, kako se kroz dostavljeni dopis JP Elektroprivreda BiH d.d. - Sarajevo, Podružnica „Elektrodistribucija“ Sarajevo nije izjasnila o tome da li je predmetna žalba/prigovor dopuštena, blagovremena i izjavljena od ovlaštenog lica, odnosno da li je ista opravdana, FERK je istoj uputio Zahtjev za informacijama broj 04-01-1258-06/09 dana 24.12.2009. godine. Ovim zahtjevom za informacijama je ponovo zatraženo da ovo javno preduzeće, u skladu sa članom 91. stavom (2) Pravilnika o javnim raspravama i rješavanju zahtjeva i žalbi FERK-a, po predmetnoj žalbi/prigovoru postupi u smislu ispitivanja da li je ista dopuštena, blagovremena i izjavljena od ovlaštenog lica, kao i da ocijeni opravdanost iste, a u skladu sa pozitivnim zakonskim propisima, sve bez odlaganja, a najkasnije u roku od osam dana od dana prijema tog Zahtjeva za informacijama, odnosno ukoliko žalbu/prigovor ne uvaži kao opravdanu, da u istom roku žalbu/prigovor sa cjelokupnim spisom predmeta dostavi FERK-u na dalji postupak. Istovremeno je ponovo zatraženo da se u istom roku ovo javno preduzeće izjasni i da potrebna pojašnjenja o okolnosti da je po Zahtjevu za izdavanje elektroenergetske saglasnosti primljenom 20.05.2009. godine donijelo, odnosno dostavilo podnosiocu tog zahtjeva Odgovor na zahtjev za izdavanje elektroenergetske saglasnosti broj 202-2635/09, njihov broj 03-4-34221-8422/08 od 30.06.2009. godine, a kojim Odgovorom odbija njen zahtjev, bez pouke o pravnom lijeku. Usljed činjenice da je podnosiocu žalbe izdata Prethodna elektroenergetska saglasnost broj 202-6622/08 od 26.12.2008. godine, kojom saglasnosti je navedeno javno preduzeće utvrdilo da „u skladu sa provedenom analizom elektrodistributivnog sistema na užem lokalitetu gdje se namjerava graditi predmetni objekat, postoje tehničke mogućnosti obezbjeđenja napajanja električnom energijom i priključenja objekta na elektrodistributivnu mrežu“, zatraženo je ponovno posebno izjašnjavanje o slijedećem:

- kojim razlozima se javno preduzeće rukovalo prilikom izdavanja Prethodne elektroenergetske saglasnosti broj 202-6622/08 od 26.12.2008. godine, odnosno prilikom utvrđivanja načina priključenja („priključenje objekta predviđa se sa postojeće niskonaponske nadzemne elektrodistributivne mreže iz TS 10/(20)/0,4 kV Faletići 1 (43), zatim da je u svrhu priključenja potrebna izgradnja nove niskonaponske nadzemne elektrodistributivne mreže na armirano-betonskim stubovima i magistralnim SKSX00/0-A 3x70+71,5mm<sup>2</sup>, te priključnim samonosivim kablovskim snopom X00/A 4x16mm<sup>2</sup> od stuba koji se predviđa u blizini predmetnog objekta, te da se mjerno mjesto mora nalaziti na objektu kupca i biti dostupno u svakom trenutku);
- koji propisi su primjenjeni prilikom izdavanja Prethodne elektroenergetske saglasnosti broj 202-6622/08 od 26.12.2008. godine;

- kojim razlozima se objašnjava činjenica da je Zahtjev za izdavanje elektroenergetske saglasnosti podnosioca žalbe odbijen Odgovorom broj 03-4-34221-8422/08 od 30.06.2009. godine, a da je javno preduzeće istu kontaktiralo, kako ona navodi, 20 dana nakon tog Odgovora i dalo informaciju istoj da ima rješenje za nju da bi se mogao izvršiti priključak;
- detaljno i obrazloženo pojašnjenje razloga zbog kojih je navedeno da je potrebno da podnosilac žalbe podnese novi zahtjev za izdavanje elektroenergetske saglasnosti, s obzirom na činjenicu da je ona takav Zahtjev za izdavanje elektroenergetske saglasnosti podnijela 20.05.2009. godine;
- pojašnjenje navoda iz dopisa primljenog u FERK 08.12.2009. godine pod brojem 04-01-1258-04/09 da je po nalogu za izvođenje radova broj: 1602-I-1 od 23.10.2009. godine izvršena izgradnja dijela niskonaponske mreže TP Faletići 1 (0043), odnosno radi li se o izgradnji dijela niskonaponske mreže, koja je bila predviđena izdatom Prethodnom elektroenergetskom saglasnosti broj 202-6622/09 od 26.12.2008. godine;
- sve informacije u vezi postojanja „bespravne mreže“ i „bespravnih kupaca“ na lokalitetu Donje Biosko (kako je navedeno u dopisu broj 04-01-1258-04/09 od 08.12.2009. godine) i načina plaćanja utrošene električne energije od strane ovih kupaca.

Povodom navedenog Zahtjeva za informacijama, JP Elektroprivreda BiH d.d. - Sarajevo, Podružnica „Elektrodistribucija“ Sarajevo je 05.1.2010. godine pod brojem 04-01-1258-07/09 dostavila FERK-u dopis. U tom dopisu je ista navela da je žalba/prigovor koja je kod ove podružnice primljena 15.07.2009. godine blagovremena i izjavljena od ovlaštenog lica, ali da je neopravdana iz razloga što podnosilac žalbe u svom dopisu traži da joj se odobri bespravni priključak, zatim da su prilikom izdavanja Prethodne elektroenergetske saglasnosti ovlaštena lica te podružnice, izlaskom na teren utvrdile da na predmetnom lokalitetu ne postoji elektrodistributivna mreža Podružnice „Elektrodistribucije“ Sarajevo, nego bespravna mreža i bespravni kupci. Zatim je navedeno da je u skladu sa članom 9. stavom (1) Opštih uslova za isporuku električne energije (Službene novine Federacije BiH broj 35/99) izdata Prethodna elektroenergetska saglasnost broj 202-6622/08, te da je tom prilikom utvrđeno da je od postojeće niskonaponske nadzemne mreže transformatorske stanice 10(20)/0,4 kV Faletići, potrebno izgraditi novi magistralni vod sa kojeg bi se izvršilo napajanje predmetnog objekta, uz napomenu da se prethodnom elektroenergetskom saglasnosti vrši sagledavanje tehničkih mogućnosti priključenja kupca na elektrodistributivnu mrežu, vrši analiza uticaja priključenja novog kupca na postojeći konzum, kao i analiza tehničkih mogućnosti osiguranja napajanja električne energije objekta iz zahtjeva. Navedeno je da su propisi koji su primjenjeni prilikom izdavanja prethodne elektroenergetske saglasnosti Opšti uslovi za isporuku električne energije (Službene novine Federacije BiH broj 35/99), Tehnička preporuka za niskonaponske priključke individualnih stambenih/poslovnih objekata (TP-9) i Procedura PSA 72/05 Prethodna elektroenergetska saglasnost za priljučenje kupca na elektrodistributivnu mrežu. Navedeno je i to da je, s obzirom da se podnosilac žalbe prvi javio sa zahtjevom za izdavanje elektroenergetske saglasnosti na navedenoj adresi, a imajući u vidu stanje na terenu kao i obim posla na izgradnji elektrodistributivne mreže, u

cilju stvaranja uslova za priključenje predmetnog objekta na elektrodistributivnu mrežu, te član 56. Zakona o električnoj energiji, Podružnica „Elektrodistribucija“ Sarajevo uputila dopis pod brojem 03-4-34221-8422/08 od 02.07.2009. godine. Dalje je navedeno i da je jasno da je, imajući u vidu činjenicu da su se od 01.07.2009. godine promijenile procedure kao i obrasci zahtjeva za izdavanje elektroenergetske saglasnosti, kao i član 97. važećih Opštih uslova za isporuku električne energije i član 27. stav (3) Pravilnika o priključcima, podnosilac žalbe dužan popuniti novi zahtjev za izdavanje elektroenergetske saglasnosti, te priložiti dodatnu dokumentaciju u skladu sa navedenim aktima, uz napomenu da se bez dodatne dokumentacije (kopija lične karte) ne može otvoriti novi zahtjev za izdavanje elektroenergetske saglasnosti. Također je navedeno da je novoizgrađena niskonaponska mreža, za koju su uložena znatna sredstva predviđena po prethodnoj elektroenergetskoj saglasnosti i ponovo se naglašava da će se u prvoj fazi moći priključiti samo objekat podnosioca žalbe, te objekti koji trenutno imaju odobrenje za građenje. U privitku je dostavljen tabelarni pregled bespravnih kupaca na predmetnom području.

U cilju okončanja postupka i upotpunjavanja svih činjenica, FERK je 19.01.2010. godine JP Elektroprivredi BiH d.d. - Sarajevo, Podružnici „Elektrodistribucija“ Sarajevo uputio Zahtjev za informacijama broj 04-01-1258-08/09, kojim je ponovno zatražio od iste da bez odlaganja, a najkasnije u roku od osam dana od dana prijema tog zahtjeva, u FERK dostavi cjelokupni spis ovog predmeta, kao i da se posebno izjasni i da potrebna pojašnjenja o okolnosti da je po Zahtjevu za izdavanje elektroenergetske saglasnosti primljenom 20.05.2009. godine donijela, odnosno dostavila podnosiocu tog zahtjeva Odgovor na zahtjev za izdavanje elektroenergetske saglasnosti broj 202-2635/09, njihov broj 03-4-34221-8422/08 od 30.06.2009. godine, a kojim Odgovorom se odbija njen zahtjev, bez pouke o pravnom lijeku.

Također radi prikupljanja svih potrebnih informacija, FERK je i podnosiocu žalbe uputio Zahtjev za informacijama broj 04-01-1258-09/09 od 19.1.2010. godine, tražeći od iste da u roku od osam dana od dana prijema tog Zahtjeva za informacijama dostavi FERK-u svoje očitovanje o svim navodima, odnosno činjenicama i dokazima, koje je JP Elektroprivreda BiH d.d.- Sarajevo, Podružnica „Elektrodistribucija“ Sarajevo iznijela kroz svoje dopise dostavljene FERK-u.

Kao odgovor na navedeni Zahtjev za informacijama, Samira Zulfikarpašić je dostavila u FERK 26.01.2010. godine svoj dopis, u kojem je navela da je kupila navedenu parcelu od Muniba Aganovića, koji je imao bespravni priključak električne energije, zatim da je prilikom prvog isključenja električne energije (zbog neplaćenog računa), kada je posjetila poslovnicu Stari grad radi plaćanja računa, informisana da nakon plaćanja računa ne može izvršiti priključenje bespravnog priključka električne energije, nego da treba raditi na legalizaciji istog, ali da istovremeno može u međuvremenu sama uključiti električnu energiju. Navela je i da je odmah počela prikupljati odgovarajuću dokumentaciju (urbanističku saglasnost i ostalo), a na osnovu čega joj je izdata Prethodna elektroenergetska saglasnost, da je poslije toga informisana i da podnese zahtjev za legalni priključak električne energije, što je ista i učinila 20.05.2009. godine, odnosno u vrijeme kada je bio važeći „stari“ cjenovnik usluga i da od nje tom prilikom nije tražena kopija lične

karte. Navela je da je nakon podnesenog zahtjeva, zaposlenik JP Elektroprivrede BiH d.d. - Sarajevo, Podružnice „Elektrodistribucija“ Sarajevo izlazio na teren, zatim da je nakon toga istu obavijestio da se ne može izvršiti priključenje električne energije i da je tada dobila i dopis od ovog javnog preduzeća, na koji se žalila. Dalje je navela da je nakon toga posjetila i zamjenika načelnika Opštine Stari grad, pokazavši mu svu dokumentaciju, a radi rješenja problema priključenja električne energije, te da je tom prilikom informisana da su u toku dogovori oko izgradnje nove trafo stanice. Navela je i to da je u avgustu 2009. godine telefonski kontaktirana od strane zaposlenika JP Elektroprivrede BiH d.d. - Sarajevo, Podružnice „Elektrodistribucija“ Sarajevo radi podnošenja novog zahtjeva za izdavanje elektroenergetske saglasnosti, nakon čega se obratila Kantonalnoj upravi za inspeksijske poslove Sarajevo i FERK-u, te da su nakon islaska navedene inspekcije na teren i njenog zaključka koji je poslan JP Elektroprivredi BiH d.d. - Sarajevo, Podružnici „Elektrodistribucija“ Sarajevo, počeli radovi postavljanjem betonskih stubova, ali da podnosilac žalbe i dalje u svom objektu nema električnu energiju, te da će podnijeti novi zahtjev za izdavanje elektroenergetske saglasnosti, ali da postavlja pitanje zašto ne može biti priključena na elektrodistributivnu mrežu po „starom“ zahtjevu i „starom“ cjenovniku. U privitku ovog dopisa nije dostavljena dokumentacija.

Povodom upućenog Zahtjeva za informacijama, JP Elektroprivreda BiH d.d. - Sarajevo, Podružnica „Elektrodistribucija“ Sarajevo je 01.02.2010. godine pod brojem 04-01-1258-11/09 dostavila dopis, u kojem je ponovila navode iz svojih ranijih dopisa, ali i to da je Odgovor na zahtjev za izdavanje elektroenergetske saglasnosti broj 202-2635/09, njihov broj 03-4-34221-8422/08 od 30.06.2009. godine, koncipiran u skladu sa Opštim uslovima za isporuku električne energije (Službene novine Federacije BiH broj 35/99), koji su prestali važiti 30.06.2009. godine i nisu nalagali davanje pouke o pravnom lijeku, uz napomenu da je podnosilac žalbe podnio novi zahtjev za izdavanje elektroenergetske saglasnosti pod brojem 202-6622/08. Dalje je navedeno da je, imajući u vidu da je ova podružnica preduzela aktivnosti na izgradnji nove elektrodistributivne mreže na predmetnom lokalitetu, izrađeno novo tehničko rješenje za izgradnju novog dijela niskonaponske mreže, a radovi da su izvedeni po nalogu za izvođenje radova na izgradnji niskonaponske mreže TP Faletići 1 (0043) broj 1602-I-1 od 23.10.2009. godine, te da su se na ovaj način stekli uslovi za priključenje stambenog objekta podnosioca žalbe na adresi Donje Biosko do br. 34, kao i da će navedena podružnica po novopodnesenom zahtjevu izdati novu elektroenergetsku saglasnost. U privitku su, osim ranije dostavljene dokumentacije, dostavljene i kopije:

- Zahtjeva za elektroenergetsku saglasnost za krajnjeg kupca – ZO3 od 26.01.2010. godine,
- Dopisa JP Elektroprivrede BiH d.d. - Sarajevo, Podružnice „Elektrodistribucija“ Sarajevo FERK-u broj 04-01-1258-07/09 od 05.01.2010. godine,
- Dopisa JP Elektroprivrede BiH d.d. - Sarajevo, Podružnice „Elektrodistribucija“ Sarajevo FERK-u broj 04-01-1258-04/09 od 08.12.2010. godine,
- Kopije katastarskog plana,
- Dopisa - dostava prethodne elektroenergetske saglasnosti broj 03-4-34221-22142/08 od 25.12.2008. godine,
- Prethodne elektroenergetske saglasnosti broj 202-6622/08 od 26.12.2008. godine,

- Lokacije objekta od 16.10.2008. godine,
- Rješenja o naknadnoj urbanističkoj saglasnosti Opštine Stari grad broj UP-I-05-23-802/07-ET od 21.10.2008. godine,
- Fature br. 8091/09 za izradu EES od 20.05.2009. godine.

Na osnovu svega naprijed navedenog, FERK je utvrdio slijedeće:

JP Elektroprivreda BiH d.d. - Sarajevo, Podružnica „Elektrodistribucija“ Sarajevo se u svom dopisu primljenom u FERK 05.01.2010. godine pod brojem 04-01-1258-07/09 izjasnila da je predmetna žalba/prigovor na Odgovor na zahtjev za izdavanje elektroenergetske saglasnosti broj 202-2635/09, broj 03-4-34221-8422/08 od 30.06.2009. godine podnosioca žalbe Samire Zulfikarpašić blagovremena i izjavljena od ovlaštenog lica. Međutim, ista se nije izjasnila ni tada ni naknadno o tome da li je ta žalba/prigovor dopuštena, osim što je u dopisu broj 04-01-1258-11/09 od 01.02.2010. godine navela da je Odgovor na zahtjev za izdavanje elektroenergetske saglasnosti broj 202-2635/09, njihov broj 03-4-34221-8422/08 od 30.06.2009. godine, koncipiran u skladu sa Opštim uslovima za isporuku električne energije (Službene novine Federacije BiH broj 35/99), koji su prestali važiti 30.06.2009. godine i nisu nalagali davanje pouke o pravnom lijeku. Međutim, FERK je utvrdio da je predmetna žalba/prigovor dopuštena, iz razloga što je članom 41. Zakona o električnoj energiji propisano da proizvođač, odnosno kvalifikovani kupac električne energije kojem je odbijen pristup mreži ili je nezadovoljan uslovima za pristup, može podnijeti žalbu/prigovor FERK-u. Predmetna žalba/prigovor je dopuštena i iz razloga što je članom 13. Opštih uslova za isporuku električne energije (Službene novine Federacije BiH broj 35/99), koji su se primjenjivali u vrijeme odlučivanja o Zahtjevu za izdavanje elektroenergetske saglasnosti podnosioca žalbe, propisano da podnosilac zahtjeva koji nije zadovoljan odlukom kojom je riješen njegov zahtjev za izdavanje elektroenergetske saglasnosti, može izjaviti žalbu nadležnom organu uprave u skladu sa zakonom. Slijedeći navedeno, nije tačna konstatacija JP Elektroprivrede BiH d.d. - Sarajevo, Podružnice „Elektrodistribucija“ Sarajevo da navedeni Opšti uslovi nisu nalagali davanje pouke o pravnom lijeku, jer je suprotno propisano članom 13. tih Opštih uslova.

U vezi samog postupanja JP Elektroprivrede BiH d.d. - Sarajevo, Podružnice „Elektrodistribucija“ Sarajevo sa žalbom/prigovorom izjavljenom 15.07.2009. godine na Odgovor na zahtjev za izdavanje elektroenergetske saglasnosti broj 202-2635/09, broj 03-4-34221-8422/08 od 30.06.2009. godine, FERK je svjestan propusta ovog javnog preduzeća da prosljedi istu FERK-u, kao nadležnom organu iz člana 41. Zakona o električnoj energiji, a u skladu sa članom 13. Opštih uslova za isporuku električne energije, te važećim zakonskim propisima o postupanju prvostepenog organa po prijemu žalbe. Kao olakšavajuća okolnost se može uzeti činjenica da je JP Elektroprivreda BiH d.d. - Sarajevo, Podružnica „Elektrodistribucija“ Sarajevo, iako je to propustila navesti, u tom trenutku zapravo postupala, u skladu sa Operativnom procedurom PSA 83/04 - Rješavanje prigovora i informisanje kupaca električne energije u Podružnici „Elektrodistribucija“ Sarajevo, a što je FERK zaključio poznavajući interne akte ovog javnog preduzeća. Navedenom operativnom procedurom je kao vrsta prigovora predviđen i prigovor u vezi elektroenergetske saglasnosti. Tako je tačkom 5.3.1. ove operativne procedure propisano da ukoliko je prigovor primljen u pisanoj formi i neophodno je odgovoriti u pisanoj formi

(kupac insistira na pisanom odgovoru), nadležni rukovodilac za rješavanje prigovora koncipira odgovor kroz napomenu u modul „Prigovori kupaca“, dok pisani odgovor priprema referent za odnose s javnošću i informisanje kupaca.

Također, prilikom provođenja postupka odlučivanja po Zahtjevu za izdavanje elektroenergetske saglasnosti, koji je podnositelj žalbe podnio 20.05.2009. godine, JP Elektroprivreda BiH d.d. - Sarajevo, Podružnica „Elektrodistribucija“ Sarajevo nije u potpunosti vodila računa o pravilima postupka. U tom smislu nije postupila u skladu sa članom 10. stavom (2) Opštih uslova za isporuku električne energije (Službene novine Federacije BiH broj 35/99), koji su se primjenjivali u vrijeme odlučivanja o zahtjevu, a kojim članom je propisano da je isporučilac dužan odgovoriti na zahtjev za izdavanje elektroenergetske saglasnosti u roku od 30 dana. Tako je o Zahtjevu za izdavanje elektroenergetske saglasnosti podnijetom 20.05.2009. godine odlučila kroz Odgovor na zahtjev za izdavanje elektroenergetske saglasnosti broj 202-2635/09, broj 03-4-34221-8422/08 dana 30.06.2009. godine. Propust je ovog javnog preduzeća i to što nije podnosioca žalbe, kao podnosioca zahtjeva za izdavanje elektroenergetske saglasnosti, u roku od tri dana od dana isteka roka za rješavanje po njegovom zahtjevu, pismeno obavijestilo o razlozima zbog kojih nije odlučilo o njegovom zahtjevu i o tome koje će radnje preduzeti radi odlučivanja o zahtjevu, te uputilo podnosioca žalbe koja pravna sredstva može koristiti, te to obavještenje nije istovremeno dostavilo i odgovornim licima u javnom preduzeću radi preduzimanja mjera da se odluči o zahtjevu bez odlaganja, što mu je bila obaveza u skladu sa važećim zakonskim propisima. Propust je ovog javnog preduzeća i to što je prilikom odlučivanja o Zahtjevu za izdavanje elektroenergetske saglasnosti od 20.05.2009. godine koncipiralo „Odgovor“ u formi dopisa. Naime u skladu sa važećim zakonskim propisima, na osnovu činjenica utvrđenih u postupku, organ nadležan za rješavanje donosi rješenje o stvari koja je predmet postupka, a to je u ovom slučaju pravo kupca na pristup mreži i uslovi tog pristupa. U skladu sa važećim zakonskim propisima je predviđeno i to da se svako rješenje mora kao takvo označiti, a posebno ako je to nužno da se posebnim propisom može predvidjeti da se rješenju može dati i drugi naziv, s tim da se rješenje donosi pismeno, a posebno, u slučajevima predviđenim zakonom, da se može donijeti i usmeno, kao i da pismeno rješenje sadrži naziv organa, broj i datum, uvod, dispozitiv (izreku), obrazloženje, uputstvo o pravnom lijeku, potpis ovlaštene službenog lica i pečat organa.

Iako JP Elektroprivreda BiH d.d. - Sarajevo, Podružnica „Elektrodistribucija“ Sarajevo nije odlučila o Zahtjevu za izdavanje elektroenergetske saglasnosti podnositelj žalbe podnijetom 20.05.2009. godine u propisanom roku od 30 dana, te je propustila podnosioca obavijestiti o razlozima zbog kojih nije odlučila o njegovom zahtjevu u propisanom roku, a na način kako je opisano, FERK je zaključio da naprijed opisani proceduralni propusti ipak nisu bili od uticaja na rješenje stvari. Naime, u međuvremenu od podnošenja Zahtjeva za izdavanje elektroenergetske saglasnosti 20.05.2009. godine do odlučivanja o istom 30.06.2009. godine nije došlo do promjene materijalnih propisa, imajući u vidu okolnost da su se 01.07.2009. godine počeli primjenjivati novi Opšti uslovi za isporuku električne energije (Službene novine Federacije BiH broj 35/08, 81/08) i Pravilnik o priključcima JP Elektroprivrede BiH d.d. - Sarajevo. Da je JP Elektroprivreda BiH d.d. - Sarajevo, Podružnica „Elektrodistribucija“ Sarajevo postupila po naprijed

navedenim odredbama Opštih uslova za isporuku električne energije, odnosno da je o predmetnom Zahtjevu za izdavanje elektroenergetske saglasnosti od 20.05.2009. godine odlučila u roku od 30 dana (19.06.2009. godine), opet bi primjenila materijalne propise koje je primjenila, a to su Opšti uslovi za isporuku električne energije (Službene novine Federacije BiH broj 35/99). Propust JP Elektroprivrede BiH d.d. - Sarajevo, Podružnice „Elektrodistribucija“ Sarajevo da pismeno obavijesti podnosioc žalbe, kao podnosioca zahtjeva za izdavanje saglasnosti, o razlozima zbog kojih nije odlučila o njegovom zahtjevu također nije bio od uticaja na rješenje stvari. Naime, da je javno preduzeće na vrijeme obavijestilo podnosioca žalbe i uputilo koja pravna sredstva može koristiti, podnosilac žalbe koristeći ta pravna sredstva ne bi mogao ubrzati postupak odlučivanja o Zahtjevu za izdavanje elektroenergetske saglasnosti, jer je o njegovom zahtjevu odlučeno već 30.06.2009. godine, a time ne bi mogao uticati ni na primjenu materijalnih propisa.

U vezi propusta JP Elektroprivrede BiH d.d. - Sarajevo, Podružnice „Elektrodistribucija“ Sarajevo da o Zahtjevu za izdavanje elektroenergetske saglasnosti podnosioca žalbe odluči u formi rješenja ili formalnog akta s nekim drugim nazivom, FERK je zaključio da također nije uticalo na rješenje stvari, iz razloga što je ovo javno preduzeće ipak odlučilo o tom zahtjevu, ali u formi dopisa koji nosi naslov Odgovor na zahtjev za izdavanje elektroenergetske saglasnosti broj 202-2635/09. Iako forma dopisa ne sadrži sve sastavne dijelove pisanog rješenja, time se nije uticalo na rješenje stvari.

I pored svih naprijed navedenih proceduralnih propusta koje je JP Elektroprivreda BiH d.d. - Sarajevo, Podružnica „Elektrodistribucija“ Sarajevo učinila prilikom odlučivanja o Zahtjevu za izdavanje elektroenergetske saglasnosti podnosioca žalbe broj 202-2635/09 od 20.05.2009. godine, FERK je ocijenio da je ista pravilno primjenila materijalni propis. U tom smislu je JP Elektroprivreda BiH d.d. - Sarajevo, Podružnica „Elektrodistribucija“ Sarajevo postupila u skladu sa članom 12. Opštih uslova za isporuku električne energije (Službene novine Federacije BiH broj 35/99), kojim je propisano da će isporučilac izdati elektroenergetsku saglasnost u skladu sa energetske mogućnostima, i usvojenim programima i planovima razvoja. S obzirom da je ista u postupku po tom zahtjevu utvrdila da na lokalitetu stambenog objekta podnosioca žalbe ne postoji elektrodistributivna mreža ovog javnog preduzeća, iz čega proizilazi da nisu postojale energetske mogućnosti za priključenje tog objekta, pa samim tim ni uslova za izdavanje elektroenergetske saglasnosti.

S druge strane, postupajući u skladu sa članom 9. istih Opštih uslova, kojim je propisano da će isporučilac izdati prethodnu elektroenergetsku saglasnost u skladu sa elektroenergetskim prilikama i planovima razvoja predviđenim za to područje, izdatom Prethodnom elektroenergetskom saglasnosti broj 202-6622/08 od 26.12.2008. godine JP Elektroprivreda BiH d.d. - Sarajevo, Podružnica „Elektrodistribucija“ Sarajevo je izvršila sagledavanje tehničkih mogućnosti priključenja predmetnog objekta na elektrodistributivnu mrežu, u smislu analize uticaja priključenja tog objekta na postojeći konzum, kao i sagledavanje tehničkih mogućnosti osiguranja napajanja objekta električnom energijom. Tako je utvrdila da je u svrhu priključenja objekta potrebna izgradnja nove niskonaponske nadzemne elektrodistributive mreže na armirano-betonskim stubovima i magistralnim SKS X00/0-A 3x70+71,5 mm<sup>2</sup>, te priključnim samonosivim kablovskim snopom X00/A 4x16

mm<sup>2</sup> od stuba koji se predviđa u blizini predmetnog objekta. Međutim u trenutku odlučivanja o Zahtjevu za izdavanje elektroenergetske saglasnosti podnosioca žalbe ova niskonaponska nadzemna elektrodistributivna mreža nije bila izgrađena, nego ju je JP Elektroprivreda BiH d.d. - Sarajevo, Podružnica „Elektrodistribucija“ Sarajevo realizovala tek kasnije, po Nalogu za izvođenje radova na izgradnji niskonaponske mreže TP Faletići 1 (0043) broj 1602-I-1 od 23.10.2009. godine. Navedeni nalog je dostavljen FERK-u 08.12.2009. godine pod brojem 04-01-1258-04/09. U tom Nalogu je naznačeno da je planirani datum početka radova 21.10.2009. godine, a planirani datum završetka radova 20.12.2009. godine. JP Elektroprivreda BiH d.d. - Sarajevo, Podružnica „Elektrodistribucija“ Sarajevo je izvijestila FERK dopisom primljenim u FERK 01.02.2010. godine pod brojem 04-01-1258-11/09 da su radovi izvedeni po navedenom nalogu, te da su se na taj način stekli uslovi za priključenje stambenog objekta podnosioca žalbe na elektrodistributivna mrežu, čime su se tek sada stekli i uslovi za izdavanje elektroenergetske saglasnosti na osnovu novostvorenih energetske mogućnosti.

FERK je zaključio i to da je, a na osnovu svega navedenog JP Elektroprivreda BiH d.d. - Sarajevo, Podružnica „Elektrodistribucija“ Sarajevo tokom postupka po Zahtjevu za izdavanje elektroenergetske saglasnosti od 20.05.2009. godine, utvrdila cjelokupno činjenično stanje u vezi (ne)postojanja energetske mogućnosti za priključenje stambenog objekta podnosioca žalbe na elektrodistributivnu mrežu.

S obzirom da je FERK kao drugostepeni organ utvrdio da se u prvostepenom postupku nije u potpunosti vodilo računa o pravilima postupka, odnosno da je bilo nedostataka, ali da to nije moglo biti od uticaja na rješenje stvari, te da je FERK utvrdio da je Odgovor na zahtjev za izdavanje elektroenergetske saglasnosti broj 202-2635/09, broj 03-4-34221-8422/08 od 30.06.2009. godine pravilan i na važećim propisima zasnovan, a slijedom toga žalba/prigovor neosnovana, FERK je odlučio odbiti žalbu/prigovor Samire Zulfikarpašić iz Sarajeva uloženu protiv tog Odgovora.

Na osnovu navedenog, a u skladu sa članom 29. Zakona o električnoj energiji odlučeno je kao u dispozitivu ovog rješenja.

**POUKA O PRAVNOM LIJEKU:**

Protiv ovog rješenja žaliteljica može tužbom pokrenuti upravni spor kod Kantonalnog/Županijskog suda u Sarajevu u roku od 30 dana od dana prijema rješenja. Tužba se predaje sudu direktno ili mu se šalje poštom preporučeno. Tužba se može izjaviti i na zapisnik kod navedenog suda ili bilo kojeg drugog suda.

**PREDSJEDNIK FERK-a**  
**Zdenko Šimunović s.r.**